

OLA

PULETINI A'OGA



9 APERILA 2018 ~ Lomiga 9 ~ Upega Tafailagi: www.ola888.com ~ Telefoni (03) 382 6674 ~ Tuatusi: ola.niupac@gmail.com; ~ evaleon.books@gmail.com ~ E le faatauina ~ A Free Publication

otootoga

Ua tuuina atu nei i a'oga ni ta'iala a le matagaluega e faatonu ai le tulaga lē manino, i le fa'aaoga o tupe a le a'oga e totogi ai ni tafaoga i fafo atu o Niu Sila. I le sailiga a le su'etusi na iloa ai le malosi o sea faiga. E iai se a'oga i Dannevirke na fa'aaoga se \$56,000 e tafafao ai se 35 tagata i Rarotonga. Na o se \$14,000 na maua i sailiga tupe a i latou na malaga.

Ua faamavae se faia'oga tamaitai mai le a'oga sa galue ai ina ua faamaonia le moliaga o le faiaiga ma se tama a'oga 16 tausaga, sa ia a'oa'oina. I Hasting's Boys High sa galue ai ma ua ave ese nei lona suafa mai le lola lesitala. E lei mamao atu le mataupu i se isi foi faia'oga tamaitai, i se kolisi i Tanetini, ua faamalolo foi i le moliaga lava e tasi.

O se tasi o a'oga aupito leva ma taualoa, le kolisi a Hato Petera, North Shore i Aukilani, o loo iai pea i se tulaga lē mautonu. O le Hato Petera sa tautuaina le fanau a'oga Maori i tausaga e tele, e to'atele ni ana ta'ita'i iloga na aoga ai. Peita'i ua le toe maua le numera e tatau ai ona fa'aaauau, atoa isi faafitauli. Taimi nei na o nai tamaiti a'oga o loo aga'i pea i ai, a o talia se faaiuga a le minisita.

Ua filifilia le tamaitai o Emily Laing o le UC e auai i se polokalame a'oga, UNLEASH, e faia i Sigapoa ia Me 30 e aulia luni aso 6. O le 'auga o le a'oa'oga o le sailia o ni tali i mea tau le atina'e e aoga mo malo tauatia'e. O Emily o loo galue mo lona tusipasi foma'i i mataupu tau Pasefika, e taula'i i le tausiga o poroketi i galuega tau atina'e. Sa maua e lona tuagane lea lava avanoa i le tausaga na se'i tuana'i.



TAUIVI MA TIGA: O se lesone o le olaga mai le tamaitai o Dame Valerie Adams. A o sauni mo le tauvaga ae maliu lona tinamatua i le kanesa. Maliu foi lona tina i le 2000 i le kanesa; feagai ma se tete'aga faaulugalii, faalavelavea i ni manu'a. Faafitia i le auro ina ua faitogafiti se isi sa laua tauva. Ae finau pea. E le taumate o le a avea uma nei—faatasi ma lana pepe fou—o ni mafuaaga malolosi e finau ai mo le sili. O ia le tasi o sui ta'alo a Niu Sila o loo faamoemoe i ai mo se tasi ana auro.

Faamalosi lapata'iga e puipui fanau i le fulū

Ua saga faamalosi mai e foma'i se lapata'iga o le tapenapena i le fulū o loo ua aga'i mai i le itulalolagi i saute.

O la latou mau e faatoluina le leaga o le tulaga e ono tula'i mai ai lenei tausaga e fua i le tausaga ua mavae.

E mafua lea ona o molimau mai le itulalolagi i matu. E faitau selau i latou na malilii i nuu Europa ma Amerika foi i le taimi o le taumalulu.

O lea ua lapata'ia ai matua ina ia fai nei loa tui puipui o i latou ma fanau a o lei o'o mai le taumalulu.

O loo ua faaopoopo i le tui masani se vailaau e puipui ai le isi 'alava o le fulū, lea ua faaigoa e nisi o le Fulū Ausetalia.

I le tausaga talu ai, e 230,000 le aofa'i o tagatanuu Ausetalia na faata'otolia ai, ae 750 na malilii. E aofia i lona numera nisi o le fanau.

E tusa ma se 400 le aofa'i o Kiui e malilii i tausaga ta'itasi ona o le fulū.

Na oo i Peretania le pesi a le fulū ma e faatoluina le aofa'i o e na malilii ai.

O le popolega o le felata'i o Niu Sila ma Ausetalia, ma e le faigata lona o'o mai e ala i femalagaiga masani.



E fa 'alava o le fulū o le a mafai ona puipuia i le tui ua saunia nei, saunoa mai se sui o le Matagaluega o le Soifua Maloloina.

Ae pei ona molimau se foma'i, e le faigofie ona mate aga a se fulū. E faapea lava o le 'alava (strain) lea, ae emo ane o se isi e lei mafaufauina.

A o le fe'au taua ia sauniuni i ai, ia faia mea uma e puipui ai le aiga, aemaise fanau laiti.

O le tui puipui le mea muamua e tali atu ai, e avanoa i ai fanau ma le aumatutua e leai se totogi. E tatau ona togafiti uma se aiga e puipuia uma ai.

Ripoti o le Vaiaso:

Molia sese se faia'oga i luma o le faamasinoga

E ono aso o le faamasinoga o se faia'oga i le maota faamasino faaitumalo a Aukilani.

Na faaulu le tagi e leoleo e tauala i se a'oga ma ni teine a'oga se to'atolu, na tuua'ia le faia'oga i le faaoolima matagā ia i latou.

E fitu ni moliaga e aofia ai, ma sa faapea ona finauina uma na i le va o leoleo ma le loia a le itu tetee.

I le folasaga a leoleo na faaalua ai le autu o moliaga, e aga'i uma i le na molia, i ni mea e faapea sa tutupu i le va o teine ta'ito'atasi ma le faia'oga.

O nei uma na matuā te'ena e le loia a le faia'oga o ni tala faatupu ma le taufaaleaga.

E talitonu le loia o se taupulepulega lenei sa faia e ni teine a'oga; ma e iai ni molimau e faamaonia ai sa faufau leaga i latou e tuli ese le faia'oga. Na mafua ai le moliga o le faia'oga.

Ina ua su'esu'eina i latou ta'ito'atasi na le'i fesoota'i a latou molimau ma moliaga sa tuua'iina ai le faia'oga.

Na 'autasi le laulau a faamasino i le



TUUA'I SESE: Ua iloa le vavevave o a'oga e momoli faia'oga i le tulafono pe a tuua'iina i le faaoolima matagā, poo le pa'ia o latou tino, e aunoa ma se su'esu'ega lelei ina ia malu aia tataua faia'oga. Pe mafua i le faamuamua i fanau, ae galo ni aafiaga tuga mo le aufaigaluega, e pei o lenei uso i le lipoti.

ta'umamāina o le suafa o le faia'oga ma ua soloia uma ai moliaga ia te ia.

Ae na saunoa le loia e faailoa lona faanoanoa i le mea ua oo i ai. E moni ua faamaonia e le faamasinoga le amiotonu a le faia'oga, a o le ila o le ta'uleagaina i ni moliaga matuiā e le taugofie. E 40 tausaga o le tautua a le faia'oga ma e le faigofie lona toe

ulufale e fa'aauau le tautua ona ua avevaleina lona igoa.

E 27 tausaga na galue ai i le a'oga lea ae na 'apo e le a'oga tala a teineiti, ta'i 11 tausaga, ma tuli ai le faia'oga.

Fa'aalia se lagona o le faia'oga o lona faanoanoa i le faiga o ia. Ua na faatusa lenei i se faalepo mata'utia e tupu i se faia'oga tamaloa i nei aso.

E le lagolagoina le fuafuaga e galulue faatasi

Manatua le fuafuaga a le National e fefaasoa'i tomai o pule ma a'oga ina ia faalaugatasia a'oga i se na tufatufaga. Lea na faatu mai ai le upu 'nuu a'oga' (communities of learning). Lea na togia ai e le malo se \$300 miliona e faatino ai!

O lena fuafuaga ua taape i luga o le 'ea e tusa i se sailiga o finagalo o faia'oga i le mataupu.

E autasi le molimau a faia'oga i le le taumanuia o sea fuafuaga ona o lape na matauina.

Muamua i le faavaeina o nuu a'oga lava ia. E manatu nisi o pule a'oga o se mea na faamalosi lona faiga.

O se faatonuga na poloa'iina ai a'oga e le minisita ma le matagaluega, ae vaivai le faavae; o se feutaga'iga i le va o a'oga lava latou. O se lape iloga lea.

I tulaga faapenei e taua le va fealoa'i o le tasi a'oga ma le isi, e faigofie ai ona faatino ni fuafuaga. Ae a faamalosi ona fai i le paoa faapolotiki, o le iuga lea e pei ona aliali mai i le sailiga.

Ina ua fesiligia faia'oga sa auai i le fuafuaga i so latou taofi, na'o le 34 pasene na ioeina sona aoga mo latou.



FAATAUMOA: Hekia Parata, o ia le sa tauavamea i fuafuaga a le National i suiga taua'oga, na tuua'iina ai le National i le aumai o ata faaAmerika e faata'ita'i i le lotoifale o a'oga a Niu Sila. Iloga lona lu'iina e iuni a faia'oga a o tula'i mai i le tofi.

Na'o le 40 pasene o faia'oga sa auai i lea fuafuaga e talitonu o se avanoa lelei e taupule ai ma uso faia'oga o isi a'oga.

Ae toe o a'oga uma na siligia e talitonu i le maualuga o tapulaa a a latou lava a'oga i soo se vaega, e aofia ai le saogalemu ma le lelei lagolagoina o i latou.

E 214 ni nuu a'oga na togia, e aafia ai ni a'oga se 1761 o a'oga a le malo. E tusa ma se 610,000 fanau na aafia ai.

E fa tausaga na fuafuaina mo lea faamoemoe ae oo mai le taimi na sui ai le malo e lei iloga ona tino mai, ona o le

faatuaui ona faamautu le faavae o nuu a'oga, talu feeseesea'iga i le va ma a'oga atoa foi ma iuni.

Lea ua molo'aua ma taoto faavaatu'ia nei ina ua sui le malo.

E le'i ila le fa'aogaga o le \$329 miliona na togia, lea ua avane e totogi ai nisi o folafolaga taua'oga a le Leipa. E aofia ai le a'oga fua o fanau i le tapulaa teseri.

I tua o fuafuaga a le National le ata faapisinisi o galuega ma pulega e faatauva le faiga, e le gata i ausiga taua'oga a o le pulega o a'oga e iloa ai le lelei i le posiposi o tupe e fua i ausiga manuia. E viia le pulega i le faasaoina o tupe.

E mafua ai le una'i a le National mo se faatupega e faitalia le a'oga ona fai.

Peita'i o lea atagalue e te'ena atoatoa e le Leipa.

Faasoa o le Vaiaso:

Tofia le laulau iloilo, tatou talosia ona faiva manatunatu

A o lei amatā le galuega o le iloilo ina o le A'oga Ataeao, poloa'iina e le minisita o a'oga, Chris Hipkins, a ua amata ona faailoa mai le lagolago a nisi i le tofiga o sui o le laulau iloilo.

E to'alima i latou, to'alua alii ma tama'ita'i e to'atolu ua tofia nei.

O le fesili o loo nonofo ma le to'atele, o le a se mea o le a ofoina mai e leni laulau e sui ai le tulaga o a'oga a le atunuu?

Pe faapea foi, o le a sa latou tali i le tulaga o fanau Maori ma le Pasefika, e ala i ni tonu latou te fai, e faavae ai ni suiga aupito lelei e ao ona faatino, e faaleleia ai? O le tali, Tailo i ai.

E tele tala malie e fai i komiti ma laulau e tauavaina ni faamoemoe. E iai leni i le solofanua na fau e le komiti ae uma ane o le kamela.

E faatusa i ai aga masani o mea nei o komiti, e naunau e fau se falata aupito malosia ma saosaoa, ae uma ane o se isi fausaga.

E iai ma le isi leni, o le komiti o se vasega e le mafai e se to'atasi ona faia se tonu, ae mafai ona latou autasi, e le mafai ona latou faia se tonu.

E atagia i nisi lafoga le agaga e faatu ai ni komiti, ma le naunauga o se pulega malo e faatatau i se komiti; o i latou le tali a le malo i le faafitauli. I le tilotilo mai a le atunuu, ua tofofi polofesa ma e atamamai e faia le iloiloga.

I le taimi e tasi, e noatia le komiti i naunauga o le malo, le faasoa tautupe, ma le utiuti o sana pule e faatino ai le atoaga o ni suiga ua loto i ai.

E moni la e sa'oloto le komiti i le fausaga o le manu, ae i le iuga e pule le malo. Afai e apo e le malo le fausaga a



le komiti, o se tulaga lelei lea. Ae i le lalolagi o mea moni, e le tupu soo se mea faapea.

E leai se komiti poo se laulau e naunau e fau se mea e tulagalua; auā e atagia ai o latou tagata i le tilotilo mai a le atunuu. E naunau uma e saunia se tali aupito ma'ai ma malosia e iloa ai o latou agavaa.

E talitonu foi e le na o sina komiti leni ua tofia. O nisi lava o faamatua i le faiva e mautinoa o le a le ta'ia faai'avai le tofa ma le faautaga.

O le tai'ta'ifono o Bali Hague, sa galue o se pule a'oga, o se tasi e lagolagoina le atagalua o le A'oga Ataeao. E le taumate o le a finau i le faatumauina o le tele o faiga sa sau a'i a'oga i na fatia. Na faaalua lona apoina o le sa'olotoga o pulega e fai ai tonu e aunoa ma le faa-lavelaveina. E foliga e le 'au sona taofi i le soona sui o le faata'otoga ua iai.

O le alii polofesa o John O'Neill, o se ua iloa le tete'e i le ata faapisinisi a le National ina ua faatu mai. O se e tu mo matapu tau le fanau e pei ona iloa ai le Leipa ma le Green i a la anava faalenuu. E mafai ona faapea o ia le sui o ia pati i tonu o le komiti.

O Cathy Wylie e le tau faailoaina i le itu i su'esu'ega tau mataupu a'oga. O ia le tasi o leo faasalaese malosia i le National a o aveva ma malo.

O lana su'esu'ega e faatatau tonu i le A'oga Ataeao, na ia laga ai ni mea taua e fia faaleleia. O lea foi o le a tilotilo atu i ai le komiti o se e faapitoa sona sao i le iloiloga.

O nisi o suiga o loo naunau Dr Wylie e faatino e iai lena i le faavaeina o se pulega se tasi e lagolagoina a'oga mai le faamasani e aulia le tapulaa teseri. Ia tasi foi se pulega e nafa ma le faiga o su'ega ma iloiloga o a'oga.

O isi sui e to'alua o Barbara Alaalatoa, ua silafia lava foi, e mafai ona faapea o le sui mo le Pasefika, ma le tama'ita'i polofesa o Mere Berryman, tamaitai Maori, o le a fai ma sui o tama a le elele i tonu o le komiti.

E manino le finau a Dr Mere mo ona tagata, e mana'omia se taiala e atagia ai se faiga tutusa o fanau uma. Faiga tutusa e amana'ia ai auala faaMaori e fetau mo ana lava fanau.

Ese mai i le fausaga ma le ata isi mataupu e tataua ona afea i le iloiloga. E aofia ai le faaleleia o le tulaga o faia'oga, i totogi ma le tulaga amana'ia.

E taua tele le 'aufaigaluega. Molimau le potomasani, e leai se suiga o se galuega mo se lelei pe a le fiafia le 'aufaigaluega. E leai se e naunau e galue pe a le amana'ia se tautua e ala i le lagolagoina lelei.

Ae tatou talosia ia o latou faiva.

Sootaga o se faia'oga fiafia ma ausiga manuia e le siligia

E talanoa le Ekalesia Metotisi i le gagana o la'au fesi'ita'i o le faato'aga. I taimi na e lau ai le tusi tofiga.

E manino le faatusa, o faifeau o la'au o le tovine a le Alii, latou te o atu e fai ma faapaologa i tagata, ma fafaga mamoe i o latou fua suamalie.

Ae fai mai le Salamo 1 e iloga le la'au e lata i le vai, poo le vaiola lava lea e maua i le e ana le galuega. E mafua ai ona fua mai i fua lelei uma.

E ono faatusa foi i ai le galuega a faia'oga. O i latou o la'au o le faato'aga a se Malo i le laufanua o a'oga.

Latou te faapaolo ma fafaga le fanau i o latou fua suamalie. Ae faalagolago lena i se tausiga lelei a le Malo e ana faia'oga.

Molimau le 'ausu'esu'e ma le olaga i le potomasani, a fiafia le loto e uma le aso o nofo i le potua'oga ua le fia alu i le aiga. Ae a tuta'ia le fiafia, e nofo fua a o le agaga ua le fia iai.

O se tasi o mea e taunapa i ai pisinisi tetele a Iapani o le tapa o ni lagona o a latou tagata faigaluega. E fia iloa e le pulega poo fiafia i le faatinoga o latou tiute. Auā ua iloa e pulega le sootaga malosia o le loto fiafia ma ausiga manuia e tula'i mai, e lelei mo le pisinisi toe lelei foi mo le 'aufaigaluega.

Aisea? Auā ua le faia le tiute tau ina faataunuu a ua fai ona o le loto ua malie.

I nuu e iai Finelani e totogi lelei ma amana'ia a latou faia'oga, o malo foi na o loo selesele fanau i fua suamalie.


Toe selesele le malo i le sao o fanau i le gaosiga o se tamaoiga malosia.

E leai se faifaato'aga e sasa'a na'o se ipu vai e tasi i se la'au ae mana'o e fua feti'iti'i mai. Pe naunau e sui ausiga ae le lelei le lagolagoina o le 'aufaigaluega. Tulafono faanatura e le pepelo. E fua mai lava le ipu vai e tasi i lona fua, e tasi le ipu vai.

Ua mana'omia e faia'oga se siitaga lelei i a latou taga ma o latou agaga; ua tataua ma onomea so latou tau.

"mafauauga o le vaiaso"

E le faatusaina le tiga leni i le olioli e faaalua mai i le aso a sau Paulo le Aposetolo



APERILA 8-14

8

1928 Tuua Samoa e Richard-son; sui Stephen Allen

1973 Maliu JW Davidson, le sa fautua i le tusiga o le faavae

9

1872 Avatu se talosaga i le peresitene Amerika e avatua Samoa i lana tausiga

10

1974 Tatala faletalimalo Tusitala mo le taimi muamua

12

1982 Sainia se maliega va Samoa ma Niu Sila; mea tau femalagaiga i le ‘ea

13

1982 Filifilia Vaai Kolone o le palemia, 24-23 palota

1993 Malo le Manu Samoa ia Kuiniselani, 27-19

2002 TAM. Malo David Tua ia Fres Oquendo fusi NABF

14

1945 Aso fanau Tuilaepa Sailele Malielegaoi

2000 Faamaonia moliaga o Leafa Vitale ma Toi Aukuso e le faamasinoga

Nisi o aso fanau iloga masina o Aperila:

8 Aperila 1965

Laauli Michael Niko Jones (lakapi) aulia lona 53

8 Aperila 1941


Tuiloma Nerony Slade (loia) aulia lona 77

12 Aperika 1981

Tulsi Gabbard (upufai malo) aulia lona 37

13 Aperila 1957

Joe Stanley (lakapi) aulia lona 61




LE tausaga 1993 o se tausaga manuia mo le Manu Samoa. Siamupini o le Tafatolu o lea na filifilia ai o le sui o le Pasefika e tauva i le 10 Lapo’a (Super 10. O le 10 Lapo’a e faatatau i le

taamilosaga lakapi na laga’ia i le 1993 e aulia le 1995. E mautinoa o se tauvaga sa iloga sona sao i le atina’e o le Manu Samoa talu lona ofi i le maea o tauvaga faapolofesa. Amata i le 1993, e 10 ‘au na fili mai i atunuu e lima—Niu Sila, Ausetalia, Aferika i Saute, ma Samoa. O ‘au mai Aferika e iai Natal. Northern Transvaal ma Transvaal. Niu Sila e fa, e iai Aukilani, North Harbour, Waikato ma Otago. Ausetalia e lua, na fai ma sui Queensland ma New South Wales. Ia, ma Samoa, siamupini o le tafatolu na fai ma sui o le Pasefika. E 2 malo o Samoa i le Pulu A, 2 malolo; maua ‘ai e 8 e tulaga 3 i le aofa’i o ‘au e 5 i le pulu. E le i au Samoa i le semi ae na saili le siamupini e Aukilani ma Transvaal, malo Transvaal 20-17 i se taaloga e tauvai tutusa le malolosi.

Ae na iloga lona tauvaga mo Samoa auā na faamau ai ni ona malo i nisi o ‘au malolosi e iai Queensland, 27-19; ma Otago, 30-20. I le 1993 lava na tofo ai e Samoa le malosi o le Olopeleki a Niu Sila mo le uluai taimi. Na mafai e Samoa ona laasia le laina sikoa, e 35-13 na malo ai Niu Sila. I le tausaga lava lea na malo ai lana ta’ito’afitu i le vae o le taamilosaga i Hong Kong, 14-12 ia Fiti. Sosoo ai ma se manumalo mata’ina ia Uelese i le tausaga na sosoo ai, 34-9, i le Apia Park. E fa ni ana malo i sana taamilosaga i Ausetalia i lea lava tausaga ae malolo i le suega ma le Ualapi, 3-73. O le 1991 e aulia le 1996 o se periota mata’ina i ausiga a Samoa i le taaloga o le lakapi.

Aperila i le Tala Faasolo o Niu Sila



8 Aperila 1873. Palemia Julius Vogel uluai galue teutupe malo o Fox

10 Aperila 1968. Goto le Wahine i Ueligitone, 51 maliliu ai

10 Aperila 1973. Taofi e le malo o le Leipia le tuuvaa mai o se malaga taamilo a le Springboks Aferika i Saute

NIUPAC PUBLICATION

Email: evaleon.books@gmail.com
Phone: (03) 382-6674
Postal: 39 Basingstoke Street,
Aranui, Christchurch 8061

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

NIUPAC 2011

Editor:
LPS Tavita, MPS, BTheol, BA, Grad Dip Tchg
ltavita8@gmail.com
Reporters:
Saili Aukuso, MA, BEd, DipTESL, DipTchg
saili.niupac@gmail.com
Fili Fuaava
ola.niupac@gmail.com

EVALEON BOOKS & NIUPAC PUBLISHING


Telefoni (03) 382-6674. Tuatusi meliE: evaleon.books@gmail.com



Sponsors:


Evaleon
Books &
Niupac
Publishing

Tautua e ala i le gaosia o alaga’oa mo a’oga (tusi mo le a’oa’oia o le faitau i le gagana Samoa, tusi e a’oa’o ai gagana, kalena, posters, yearbooks, brochures). E tautua fo’i i le fa’aliliuga o gagana, ma le tapenaina o ni tusi e fia lomai i so’o se sionara o fatuga.



TAALOGA PASO SAMOA ~ GAGANA E LUA

1. Faatumu le pusa i upu/igoa Samoa poo se tasi e faatonuina. Fill the grid with the Samoan equivalents or any other as directed.




LPSTavita 2018 Copyright

ACROSS


- 1. grocery (6)
- 4. whistle (4)
- 8. eagle (4)
- 9. to wake someone up (6)
- 11. friend (2)
- 12. run over by a vehicle (3)
- 14. biscuit (4)
- 16. the (article) (2)
- 17. forest (3)
- 18. to put thatches on a roof (3)
- 20. to fence (2)
- 21. God (4)
- 25. baby stops cry (2)
- 26. broken (6)
- 29. hibiscus (4)
- 31. to teach (4)
- 32. trip (6)

- 12. locust (2)
- 13. give to (5)
- 14. mower (3)
- 15. come (3)
- 16. a fish name (2)
- 19. hero (3)
- 22. decorations (5)
- 23. burden (5)
- 24. whether (2)
- 26. stone (3)
- 27. this (3)
- 28. burst (2)
- 30. between (2)

Tusi e fesoasoani:



Solution ~ Tali



DOWN

- 1. symbol (7)
- 2. subject, theme (4)
- 3. learn (2)
- 5. begin (5)
- 6. first (5)
- 7. straight (3)
- 10. slap (2)

Laufatu Samoa:

Tusi fou o iai se molimau a se faletua i lona tupuaga ma le valaauina

O le aso 21 o Aperila 2018 e tatala ai le tusi ua faasuafaina Ua Sina Le Galu: Ave Lo'u Ola la Aogā. E 11 le aofa'i o ana tusitala, e iai le suafa o le faletua malolo; Lulu Leleisi'ua Wong-Kee, e ese foi lona tala auā sa tautua e ala i ni ekalesia se lua. I lenei siitaga mai lana tala se molimau i lona tupuaga. Mai i se aiga toaaga e atina'e i se valaauina e moomia ai se agaga faapea:



O lo'u tupuaga

O nai o'u matua. O lo'u tamā o lona igoa o Wong-kee, o si o'u tina o Pei Taliau Atipopo Wong-kee. O nai matua Samoa o lo'u tamā o Rev Fiamalua ma Ailini Fiamalua, o i laua o ni faiaoga i le Kolisi Faafaifeau a Malua i le Ekalesia LMS. E faapea le tala ina ua taunuu Saina i Samoa na maua ai so la atalii Saina, ua la vavaeina loa faatulafono ma ua mafai ai ona nofo i Samoa. Ua maua ai foi sona to'alu Samoa o Pei Taliau Atipopo. O Pei Taliau Atipopo o ona nuu o Faleula, Lepea ma Salelologa. Sa faae'e i ai le suafa o Taulapapa mai le alalafaga o Salelologa, a o lona nuu moni o Canton i Saina. E to'atele tuafafine ma uso Samoa o si o'u tamā.

O Rev Fiamalua ma Ailini na matou ola mai ai; o se aiga agalelei ma alofofa tele i lo matou tamā. E leai se isi o uso ma tuafafine Samoa o lo'u tamā e le faigaluega lelei, e tutu lelei uma i galuega a le malo. A o le galuega a si o'u tamā sa faigaluega enisinia i le WSTEC. O ia o se faulaau su'isu'i, o se fau uati, o ia sa tausia le uati tele i Apia i na aso. Ua tuu le galuega enisinia ae tofi e le malo Samoa e alu e galue i faato'aga a le malo, ma ua ave ai i la'ua ma pule o tagata faigaluega, ma le to'atele o taulele'a Saina sa tosiina le pulu, faapea le gaosiga o le koko ma le popo a Samoa sa ave i fafo i na aso. O le nuu sa galulue ai o Sigi i Vaipapa, o le fanua o le malo. E ui i le pisi i tiute ae e le mafai ona tuusaunoina e o'u matua la la tausiga o o la matua faifeau i Malua a o maua lo la malosi e faatino ai.

A o iai pea i le vaaiga o tagata faigaluega i faato'aga a le malo, sa manatu ai la'ua ma nisi o le aumatutua i na aso, o le a logo tagata faigaluega o le a fai ni lotu i Aso Sa. Auā e le faia ai ni galuega ma ua fiafia uma tagata. I le taimi lea a o faifeau Rev Siaso ma Silafa'i i Satapuāla, ua alu le savali ia Rev Siaso ma sa talia fiafia tele ma sa amata ai lava le lotu i Sigi i lona lava Aso Sa na sosoo ai. Ma ou te talitonu o loo ola pea lea ekalesia i lea nuu.

Fa'aaauu pea le tala i o'u matua, ua uma le galuega sa iai i le malo ua toe fo'i nai tagata Saina i Saina ae o le a fo'i laua i le aiga i Savaii. Taunuu i Salelologa le nuu o lo'u tina fai mai o se amataga manuia ma lelei, a o le taimi lea e leai se isi o le fanua ua matua, a o matou laiti uma, a ua tuu atu lo la faatuatuaaga i fanua a le matai o le aiga, o le a le ta'ua suafa. A o le mea ua tupu ua le manuia le pisinisi. Ae sa fai le fua mata, fale tao popo, fai pusa fa'i, fai le fua koko ma le tama'i faleoloa. O na faaletonu sa le mamafa i le lotu o lo matou tina auā foi e sili lava ia te ia ona aiga e alofa tele i ai, ma ua ova ma soona ova le alofa o si o matou tina, ae tigaina ai lava si tamāloa. Ua toe timata le upega, ua toe amata le faleoloa ua amata ona fai pai, keke, masi ma tiliva solo i falea'oga o le Faasaleleaga, ma ua alofagia e le aiga ua toe tula'i mai.

O le aiga o lo'u tina. O lo'u tina o lona tina o Faatapepe o lona tina o Titi Scanlan le afafine o Michael Scanlan i Faleula, a o le tina o Titi o le afafine o Leatigaga Tupou Muamua. A o le tamā o Pei o Taliau Atipopo o le atalii o Faumuina i Lepea.

O lo matou aiga e fai si mamao ma le aai e iai Falesa matou te lolotu i ai. Ua manatu i la'ua e sili ona fai se lotu i uta i lo matou aiga auā e to'atele lava aiga e tausavali i tai i le aai i le Aso Sa. Sa faapea lava ona fai, ua faailoa i tai i le tausii matagaluega. Ma ua amata le lotu i Vaipapa i le fale Samoa ma sa tofi atu lava failauga i uta e faia le lotu o Aso Sa a o faamanatuga e aofa'i i tai. Ma ua gasolo manuia le lotu, ua to'atele aiga ua lolotu atu i Vaipapa.

I le koneferenisi na sosoo ai na tofia ai le faifeau a Vaipapa. A o le taimi lea o peresitene Kamu Tagaolo. Ona faapena ai lava lea ona tausii le faifeau, ma atia'e itutino uma o le lotu i Vaipapa. Ua ou le maua suafa o le aufaigaluega sa gasolo atu i Vaipapa, e na o si faifeau e suafa ia Ta'ai, ma Sinoti ae ou malaga atu loa i fafo. O sina tala lea o nai o'u matua ma lo'u tupuaga.




E te maua le atoaga o le molimau a Lulu i le tusi.



PASI ATU LA TATOU PULETINI I LE TOU A'OGA, AIGA, LOU TUAOI, AU UO, E AOGĀ MO LE FANAU A'OGA



Igoa: Thomas Jefferson
Aso Fanau: 13 Aperila 1743
Ausiga: lauiloa i le tusiga o le faavae o le Malo Amerika
Fetu: Arisi



“Ua matou talia nei mea moni o ni mautinoaga: na faia ia tutusa tagata uma; na fo’aiina i ai e lo latou Mataisau ni aia tumau, e aofia i nei le OLA, SA’OLOTOGA ma le SAILIGA O LE LOTO FIAFIA.” O se faaSamoa lena o nisi o upu lausilafia i le gagana Peretania, le upu tomua o le Faavae o le malo o Amerika. Ua le o toe po se lilo, o Thomas Jefferson e ana upu, o ia foi le Tusitala Muamua i le lisi o i latou na galulue i le tuufaatasia. E iloga Jefferson i ta’ita’i o le malo Amerika. Ua ta’ua o se alii o taleni e tele. O se faipule sa peresitene, sui peresitene; sa galue foi o le failautusi a le malo; sa loia. O se pule faatoaga, e tele ona tomai i le tausiga o laau, poto i le matematika, le tusia o fausaga o fale ma masini, o se alii o gagana, a’oga i ni gagana se tolu ma tusitusi ai e faaopopo i le Igilisi, se tusiupu o le tala faasolo, o se faitofa e iloga foi. Peita’i ua iloga ma tuese sona sao mo lona atunuu i ona pulega ma upufai. I lana nofoaiga na faatau ai Louisiana ma New Orleans mai ia Farani, e faaopopo i le iuni; o se faaiuga taua tele i le toe tepa i tua. Ua ta’ua Jefferson o le fofoga mua o talitonuga temokarasi ma le mau faaripapelika i le lalolagi, e pei ona manino i upu tomua o le faavae. O Amerika le malo ua sili le taunapa i aia tatau tutusa, le sa’olotoga o le tagata i soo se mea e fai, e mafua ai ona apo gofie faiga faapisinisi e faasa’oloto ona fai. Amerika o se malo e faatau le sailiga o le loto fiafia, e iai ona le feaiaa’i le lotu ma le malo. Ui e lei atoa tino o le upu a Jefferson, pe a taga’i i le tala o lenei nuu, ma mea tutupu, a ua iai le sulu faasino ala e taula’i i ai le vaai a ona tagata. E avea pea ma sini e fia ausia.

ATI A'E UPU:
ripapelika (nauna) faigamalo faaperesitene, e ese mai faigamalo e ta'ita'ia e se tupu; peresitene o se tasi lava tagatanuu. republic
peresitene (nauna) ta'ita'i o faigamalo faaperesitene; ta'ita'i o se faa-lapotopotoga. Igilisi president. Isi sipela—peresetene, pelesetene
soga (nauna) tagata i se fagogo poo se talafatu. character(s).

Tulimau o Pola:

Molimau le foafoaga ma se faaualoaga o upu o le gagana



FAI MAI e iloa le Atua i Lana Foafoaga. O le tasi molimau malosi i le iai o se Mataisau i tua o mea uma. Nisi o upu matagofie o le gagana o na i le Natura Fanua. Iesu ma le lauga i fuga e faaofuina le laueleele. “Ia outou mafaufau i lautalotalo o le vao . . .” Tailo i se isi fatusolo fanua, a o le to’atele o e ta’uta’ua na faagae’eina i lea fatuga a le Alii. O le Alii na te anoano mea e tau i ai le vaai i aso uma, ae misi lava ia i tatou le fe’au. E oo i se fuga faatauavaa i le fanua, pe ola na o ia i sina pa’usisi e tau le iloa atu, ae ta’u mai i lona pupula ma le fausaga le fe’au e tasi: e iai Le na faia a’u. E leai se saienitisi poto i lenei lalolagi na te foaina se fuga, i le lasi o ituaiga, i o latou matagofie eseese tutasi. Poo laau o le togalaau, e oo lava i vao ma taataa a le ala e tofu ma se matagofie. Ae le o tagata uma latou te iloa atu, fai mai ai le alagaupu a Saina.

Fesoota’i le Natura ma le sailiga o le fiafia e pei ona talanoa mai Jefferson. I le totona ma vaai atu i le ola a’e o sou togalaau, ma e faatali i le taimi e fuga mai ai. O la’u mea fiafia le tatala o le faamalama i le taeao ae fai mai le faalelegapepe a nai italia i fafo. Mata’utia. E oso fua le fiafia, tusa pe leai se mea’ai. Pau la’u upu, “Faafetai Lia, sa’o faalalelei.” Ae tali mai latou, “Viia le Mataisau. Faafetai foi ia te oe le teulaau. Ma se’i e sau e vele ese nisi vao a matou momole.”

Fesili mai se tama a’oga pe sa ou faia se tauaga. A o le ā le laau e fai mai ai. Ona ou faamatalā lea i ai. O la’u tala e le o se tala faalogo, na ou fai tauaga mai poo le 6 o’u tausaga i Falealili. E o i uta e ta mai fa o le laufao, ona salu lea ia mamā ma atuani i se mea ma’ai. Maua ai le ‘alava e fai ai le tauaga. Manaia tele le gagana o tauaga, ae afai e alu a’i le toe o nisi e ta laufao ona galo lea ma maumau. Ua tele le mau apa pe’epe’e. Fesili mai le Faasoa pe iai se tatou upu mo le ‘flu strain’ o’u manatua le ‘alava e fai ai le tauaga. Lea ua iai le faaupuga o se ‘alava o le fulū.’ Sa ou mafaufau i moia’a foi ia e fai ai faata’a i le matofi. Manaia foi. A o lea ua tasi ia ‘alava, e fai ai lenei taimi.

E talitonu lo’u sui i le agavaa o le laulau iloilo lea ua tofia. Pau le popolega auā o ni sui nei e taufai agavavale uma, aemaise lava O’Neill; lona uiga e ono falala pitotasi se iuga. Ae talosia e soso laitiiti se to’alua i le isi pito ina ia maua le paleni. Na o Barbara pei uma lava e taumatau, ae leai foi se mea o iai. Ua leva foi ona tautau pitotasi le mea ia i le National.

Faafetai ia Raymond na faasoa mai i le mataupu i fana i le vaiaso ua te’a. E sa’o, e le leaga auupega a o le tagata e fa’aogaina. Ana se mea e tago Peteru i le pelu e puipui ai le Alii e lelei. A ua tago i le sesele fua le taliga o si auauna. E ese le ’u’u e puipui atu ai le osofa’i mai, ese le fa’aoga sese i tina e pei o le autu o le faasoa. A ia manuia lava lenei vaiaso.

